

Supervizor za Brčko imenuje članove Ureda za reviziju Brčko Distrikta



Supervizor za Brčko, Raffi Gregorian, je danas izdao [nalog supervizora](#) kojim se imenuju članovi Ureda za reviziju Brčko Distrikta: gđa Dževida Hodžić se imenuje na radno mjesto glavnog revizora Ureda za reviziju, a gospoda Tomo Vozetić i Božo Zimonjić se imenuju na radna mjesta zamjenika glavnog revizora Ureda za reviziju.

Zakon o reviziji finansijskog poslovanja institucija Brčko Distrikta, koji je usvojila Skupština Brčko Distrikta u julu 2005. godine, predviđa uspostavljanje ureda za reviziju finansijskog poslovanja institucija Distrikta. Zakon navodi da će postojati jedan glavni revizor i dva zamjenika. Zakon isto tako propisuje da Skupština Brčko Distrikta imenuje osobe na ova radna mjesta u roku od tri mjeseca od dana kada zakon stupi na snagu. Nakon tri konkursa, u decembru 2006. godine, revizori još uvijek nisu bili imenovani.

Supervizor Gregorian, razočaran dugim odlaganjima i politizovanjem koji su se dogodili u procesu imenovanja glavnog revizora i dva zamjenika, je stoga izdao instrukciju Komisiji za izbor, imenovanje i mandatsko – imunitetskoj komisiji Skupštine Distrikta da obustavi bilo kakve dalje aktivnosti u procesu odabira 11. decembra 2006. godine. On će sada imenovanja izvršiti sam. Supervizor žali što postoji potreba za intervencijom da se izvrše ova imenovanja. Ali, budući da ne vidi realnu alternativu nakon dugih odlaganja, odlučio je da sam obavi imenovanja kako bi se osiguralo efikasno funkcionisanje institucija Distrikta i zaštitio zdrav finansijski sektor Distrikta. Brčko Distrikt je jedino mjesto u BiH u kome nikad nije postojala unutrašnja revizija

institucija vlasti.

Imenovane osobe će biti na probnom radu u trajanju od devedeset dana tokom kojeg će Ured supervizora uzeti u razmatranje njihov rad.